

Asas pemikiran ilmu takhrij dalam etika kewartawanan: Realiti dan cabaran.

Nik Yusri bin Musa

Pusat Pengajian Bahasa Dan Pembangunan Insaniah

Universiti Malaysia Kelantan

Abstrak.

Takhrij hadis salah satu cabang dari disiplin ilmu hadis. Disiplin ilmu hadis yang terdiri dari dua aspek kajian iaitu *riwayah* dan *dirayah*. Ilmu *riwayah* ialah bidang yang membicarakan *matan* hadis manakala *dirayah* pula membicarakan aspek-aspek perawi sama ada periwayatannya ditolak atau diterima. Disiplin ilmu ini juga mengkategorikan berita-berita yang diterima dalam beberapa kategori dari aspek penerimaan atau penolakan sesuatu berita. Selain itu ilmu *al-jarh* dan *al-ta'dil* iaitu salah satu bidang penting dalam disiplin ilmu hadis juga jika dikaji mempunyai perkaitan yang rapat terhadap konsep kewartawanan.

Keyword : Konsep Kewartawanan Islam – Ilmu Takhrij Hadis

Konsep kewartawanan

Kewartawanan sebagai satu kerjaya penyebaran maklumat mempunyai peranan yang penting dan kesan yang berterusan kepada individu dan masyarakat. Pembinaan modal insan yang seimbang, penyusunan institusi keluarga yang tenteram dan pembentukan masyarakat yang damai tidak mungkin dapat dilakukan sekiranya sebaran am, serta bacaan umum yang membentuk pemikiran masyarakat menuju ke arah keruntuhan moral dan kerosakan akhlak menerusi penonjolan berita serta *khobar* yang menggalakkan ke arah tersebut. Pandangan serta khobar berita yang bebas secara mutlak dan tidak terikat dengan norma-norma nilai dan akhlak yang elok tentunya akan mempengaruhi audien dan masyarakat awam. Justeru kerjaya sebagai wartawan dari beberapa aspek dilihat sebagai kesinambungan daripada kerjaya atau profesion sebagai seorang pendidik dan juga dipandang sebagai ibadat oleh Islam.

Pandangan popular menurut tuntutan kapitalisme, akhbar dan majalah perlu dijual bagi menjana keuntungan, tanpa menghiraukan bentuk dan penonjolan berita sama ada membina atau meruntuhkan merupakan pandangan yang cukup bahaya dan boleh meruntuhkan institusi masyarakat. Wartawan atau editor yang mempunyai pemikiran sebegitu sememangnya tidak layak menduduki 'tempatnyanya' menurut pandangan Islam. Islam amat menekankan keharmonian dan kesejahteraan masyarakat, justeru itulah masyarakat perlu dijaga dan dididik dengan kebenaran dan kebaikan dan tidak

didedahkan dengan kebejatan/kemungkarannya serta kemaksiatan. Sehubungan itu Islam mengemukakan suatu pendekatan yang juga bertindak sebagai satu bentuk kawalan. Memastikan kebenaran sesuatu khabar/berita yang diterima amat dituntut dalam Islam. Walaupun menghadapi kesukaran, kesusahan atau apa jua bentuk ujian dalam usaha mendapatkan kebenaran berita tersebut namun usaha tersebut dianggap sebagai jihad dan diberi ganjaran oleh Allah s.w.t. Ia sebahagian dari cara untuk menyelamatkan ummah, bangsa serta masyarakat daripada menerima berita yang tidak dipastikan benar atau tidak. Justeru itulah di dalam Islam perlu dipastikan dari mana berita itu diterima dan siapa yang menyampaikannya. Kerana itu jugalah disiplin ilmu Islam mengemukakan satu istilah yang dikenali sebagai sanad dalam usaha memastikan bahawa khabar tersebut benar dan diterima dari individu yang diyakini dari aspek akhlak dan keterampilannya. Sehubungan itu Abdullah ibn Mubarak umpamanya menegaskan: (Lihat al-Qasimi, (إن هذا العلم دين فانظروا عن تأخذون دينكم)

maksudnya: sesungguhnya ilmu ini adalah agama, maka kamu perlu pastikan dari siapa kamu ambil agama kamu". Begitu juga dengan Syu'bah, seorang cendekiawan muslim menjelaskan:

(الإسناد من الدين ولولا الإسناد لقال من شاء ما شاء)

maksudnya: "Isnad itu adalah sebahagian dari agama, kalau tiada isnad nescaya akan berkata lah siapa sahaja yang dia mahukan".

Kenyataan yang dikemukakan di atas membuktikan bahawa betapa para ulama Islam begitu perihatin terhadap sesuatu khabar berita yang diterima dengan cara memastikan dari mana datangnya khabar tersebut dan siapa yang menyampaikannya. Malah dalam pengajian ilmu mustalah hadis terdapat satu perbincangan khusus yang membicarakan mengenai akhlak serta perilaku individu yang tidak dapat diterima perkhabarannya. Malah sekalipun perkhabarannya diterima perlu pula dipastikan bahawa sanadnya tidak terputus. Sekiranya berlaku kekurangan terhadap dua perkara tersebut maka nilai berita yang dibawanya dikategorikan dalam berita yang meragukan.

Kewartawanan Sebagai Suatu Ibadat

Setiap pekerjaan atau amalan yang dilakukan menjadi ibadat apabila ia dilakukan dengan penuh ikhlas, kesungguhan, tanggungjawab serta menyedari dengan penuh keinsafan bahawa tugas dan perannya sebagai khalifah dan hamba Allah di alam ini. Apa jua pekerjaan yang dilakukan manusia apabila mencukupi syarat yang ditentukan oleh syari'at maka ia dianggap sebagai ibadat. Syarat-syarat bagi menjadikan amalan umum sebagai suatu ibadat ialah yang melakukan pekerjaan tersebut merupakan individu yang beriman, amalannya tidak bertentangan dengan syari'at Islam dan pengamalannya perlu menyematkan keikhlasan dalam dirinya. Kenyataan ini berdasarkan kepada firman Allah s.w.t. ayat 124-125, surah al-Nisa'

Maksudnya: "Barangsiapa yang mengerjakan amal-amal saleh, baik laki-laki maupun wanita sedang ia orang yang beriman, Maka mereka itu masuk ke dalam surga dan mereka tidak dianiaya walau sedikitpun.

Dan siapakah yang lebih baik agamanya dari pada orang yang ikhlas menyerahkan dirinya kepada Allah, sedang diapun mengerjakan kebaikan, dan ia mengikuti agama Ibrahim yang lurus? dan Allah mengambil Ibrahim menjadi kesayanganNya”.

Kewartawanan sebagai suatu kerjaya profesional sememangnya menepati syarat-syarat yang diutarakan, terutama sekali ia merupakan suatu profesion yang terangkum dalam kategori amalan-amalan baik menurut ‘uruf dan juga pandangan syara’. Merujuk kepada ciri-ciri kerjaya profesional sebagaimana dikemukakan oleh Drewry iaitu wujudnya, badan pengetahuan profesional, kesedaran sosial, kod etika, lessen untuk mempraktik serta bertanggungjawab, (Faridah Ibrahim, Mus Chairil Samani: 89) maka Islam melihat ia sebagai satu bentuk hikmah yang hilang daripada umat serta lahir dari kemajuan pemikiran manusia yang perlu dimiliki oleh umat dalam mengatur kehidupan ke arah yang lebih baik. Al-Qadhi ‘Iyadh, menggariskan bahawa sesuatu pekerjaan dikira sebagai amalan soleh apabila menepati beberapa kriteria yang ditentukan, iaitu ikhlas dan amalan yang dilakukan merupakan amalan mubah atau harus dan bukannya kegiatan-kegiatan yang diharamkan syara’. Apa yang pasti, kerjaya sebagai wartawan pada prinsip asasnya ialah mubah iaitu harus menurut Islam. Justeru itulah ia terpulang kepada empunya diri itu sendiri sama ada mahu menjadikan kerjaya profesionalnya itu sebagai satu ibadah atau hanya semata-mata sebagai satu kerjaya.

Melihat kepada kod etika bagi para wartawan sebagaimana dinyatakan dalam mana-mana kod etika yang digubal terutama sekali kod etika (NUJM) dalam konteks kontemporari, maka tentunya menepati konsep *Maqasid al-Syari’ah* iaitu matlamat utama kewujudan syari’ah itu sendiri. Apatah lagi dalam bidang kewartawanan ini yang amat dipentingkan ialah kebenaran, kejujuran, kebertanggungjawaban serta keaslian. Semua konsep-konsep yang dinyatakan itu sememangnya menepati intipati amalan-amalan soleh sebagaimana dikehendaki oleh Islam. Istilah-istilah tersebut menyamai konsep *al-Itqan*, *al-Mas’uliyah* dan *al-‘Ubudiyah* dalam konteks perbahasan amalan soleh menurut persepsi Islam.

Kedudukan Wartawan Menurut Islam

Profesion kewartawanan merupakan suatu profesion yang dipandang mulia dan perlu diberi penghormatan yang sewajarnya dalam Islam. Peranan mereka sebagai penyelidik, pendidik dan penyebar maklumat menjadikan mereka perlu sentiasa menyiapkan diri sendiri dengan keyakinan diri, ketulusan jiwa dan ketepatan firasat yang bermatlamatkan sebagai pendokong kebenaran dan mencapai keredaan Allah s.w.t.

Wartawan sama juga seperti seorang perawi hadis atau istilah yang digunapakai dalam disiplin ilmu hadis *musnid* iaitu individu yang meriwayatkan hadis dengan sanadnya sama ada dia mengetahui isi kandungan yang diriwayatkan itu atau tidak memahaminya. Tujuan dan juga matlamatnya ialah berusaha menyebarkan pengetahuan kepada masyarakat umum. Tentunya terdapat persamaan dengan seorang wartawan yang sifatnya dan juga matlamat tujuannya ialah menyebarkan pengetahuan. Manakala pangkat kedudukan seorang wartawan yang memastikan dengan penuh ketekunan, menyaring

dengan penuh tanggungjawab serta menilai dengan amat terperinci setiap berita atau khabar yang diterima sebelum disebarkan pula kedudukannya seperti *muhaddith* iaitu suatu kedudukan yang lebih tinggi dari *musnid* (al-Qasimi,76:1979). Para perawi hadis telah diakui sendiri oleh Rasulullah s.a.w. sebagai suatu kumpulan manusia yang mempunyai kedudukan yang tinggi serta memiliki keistimewaan-keistimewaan tertentu. Sabda Rasulullah s.a.w. maksudnya: "Ilmu ini akan ditanggung/disebarkan oleh individu-individu yang 'adil pada setiap generasinya, mereka menolak penyelewengan orang-orang yang melampaui batas, pengubahsuaian para pendokong kebatilan dan takwilan orang-orang jahil".

Sehubungan itu, untuk mencapai tahap yang sama maka para wartawan perlu berakhlak serta bersikap sebagaimana para perawi hadis iaitu perlu memastikan kebenaran khabar berita yang diterima (ittisal al-sanad), oleh wartawan yang diakui berperibadi dan berakhlak mulia dengan mengikut garis etika kewartawanan (al-'adl, al-dhabit) dan khabar berita yang bakal dikemukakan buat tatapan umum dipastikan betul-betul menerusi research/kajian yang dilakukan.

Etika kewartawanan Islam

Perbezaan falsafah, prinsip serta corak pemikiran antara Islam dengan Barat sekular merupakan aspek paling jelas yang membezakan antara pemikiran Islam dengan Barat sekular. Hakikat, bahawa Islam yang berpandukan bimbingan wahyu dan intelektual pemikiran manakala pemikiran Barat yang semata-mata bergantung kepada pemikiran intelektual serta memisahkan agama dari kehidupan merupakan asas utama kepada perbezaan tersebut. Justeru konsep akhlak atau etika juga mengalami situasi yang sama. Akhlak dalam Islam merupakan matlamat utama pengutusan Rasul s.a.w. kepada manusiaⁱ dan timbangan serta nilai Ilahi yang utama.ⁱⁱ

Sementara etika menurut persektif Barat merupakan suatu ilmu yang berusaha memahami sistem moral atau tindak tanduk manusia dalam hidupnya melalui pemahaman falsafah. Perbezaan yang wujud ini tentunya amat sukar untuk mencari titik pertemuan dalam beberapa aspek, namun dalam beberapa aspek yang lain mungkin dapat dicari titik pertemuannya. Falsafah pemikiran masyarakat Barat yang bertolak dari zaman renaissans yang melahirkan pemikiran sekular juga sebagai bukti penolakan masyarakat barat terhadap agama. Situasi tersebut amat berbeza dengan pemikiran serta prinsip masyarakat Islam. Etika merupakan suatu sistem dasar akhlak atau tingkah laku dan kesusilaan seseorang wartawan. Istilah ini digunakan secara meluas dan lebih umum bagi menggambarkan prinsip-prinsip moral atau nilai dalam sistem hidup manusia tidak kira apa bentuk dan jenis kebudayaan sekalipun. Dasar etika digunapakai dalam apa jua disiplin ilmu dan kemahiran sebagai suatu usaha mengawal dan menyedarkan manusia tentang peranan dan tanggungjawabnya sebagai individu peribadi dan pekerja sosial.

- a. Disiplin ilmu periwayatan hadis sebagai etika kewartawanan.

Ilmu periwayatan hadis merupakan salah satu daripada ilmu-ilmu yang dilahirkan oleh tamadun Islam. Tidak pernah berlaku dalam sejarah tamadun umat manusia sesuatu

penukilan khabar berita melalui proses yang begitu ketat lagi profesional sebagaimana berlaku kepada umat Islam. Keperihatinan serta kesungguhan para cendekiawan muslim mengkaji, menyaring serta menapis setiap khabar berita yang diterima samada dari penambahan oleh para pendusta, penyelewengan pelampau serta takwilan keterlaluan para juhala' sememangnya berlaku dengan cukup profesional. Bernard Lewis (1993) umpamanya menerusi karyanya *Islam In History* menegaskan:

Sejak daripada awal lagi tokoh-tokoh Islam menyedari betapa bahayanya persaksian palsu, perkhabaran batil dan landasan agama yang diasaskan kepada sumber-sumber yang tidak pasti. Justeru mereka membina suatu kaedah dan pendekatan yang begitu terperinci untuk menyaring, menapis serta menganalisa sesuatu riwayat. Sistem ini begitu canggih dan profesional serta tidak ada bandingannya semenjak dahulu sehingga sekarang.

Persaksian tersebut merupakan suatu pengakuan tulus daripada ilmuan Barat terhadap usaha dan juga kesungguhan para cendekiawan Islam dalam meneliti, menganalisa serta mengkaji setiap perkhabaran yang diterima. Selain itu, situasi tersebut juga menunjukkan bagaimana profesional dan telitinya para cendekiawan tersebut menerima pakai kaedah atau etika yang ditentukan dalam disiplin ilmu periwayatan, walaupun kaedah atau etika tersebut bukannya wahyu dari langit.ⁱⁱⁱ

Situasi begini juga dilihat bertepatan dengan hadis Rasulullah s.a.w. yang menjelaskan bahawa akan terdapat di kalangan cendekiawan Islam individu yang berusaha menjaga khazanah peninggalan baginda daripada penyelewengan dan pengubahsuaian. Ini dapat difahami daripada sabda baginda: (Hadis riwayat Ibn Ady, Abu Nu'aim dan al-Darqutni daripada Usamah bin Zaid, sila lihat al-Qasimi, hal 48).

يحمل هذا العلم من كل خلف عدوله ينفون عنه تحريف الغالين وانتحال المبطلين وتأويل الجاهلين.

Maksudnya: "Ilmu ini (hadis dan periwayatannya) akan dibawa (disebarkan) dari setiap generasi oleh individu-individu yang paling mendapat kepercayaan di kalangan mereka, mereka menafikan daripadanya penyelewengan orang-orang yang *taa'sub*, pengubahsuaian oleh pendokong-pendokong kebatilan serta takwilan para juhala'".

Bertolak dari sini maka kita dapati bahawa aspek penyaringan atau penapisan terhadap sesuatu khabar yang diterima amat teliti dan cukup meyakinkan. Malah dibincangkan juga bagaimanakah seharusnya penerimaan tersebut perlu diaplikasikan dari aspek hukum sekiranya khabar tersebut tidak menepati kriteria sebagai khabar atau berita yang diakui kesahhannya sama ada kerana ia diterima daripada individu-individu yang tidak diyakini peribadinya atau khabar tersebut bertentangan dengan kebenaran yang diterima ramai.^{iv} Justeru itulah para cendekiawan Islam mengemukakan atau membahaskan satu topik yang berkaitan dengan khabar lemah atau hadis *da'if* iaitu "Hukum beramal dengan hadis *da'if*".^v

Penerimaan serta penolakan sesuatu khabar (berita) yang diterima adalah bergantung kepada dua aspek yang menjadi asas penting kepada disiplin ilmu ini.

Keabsahan atau ketulinan khabar tersebut sendiri dari sumbernya (إتيصال السند) dan juga akhlak perilaku serta etika individu (عدالة الراوى) yang menukilkan sesuatu khabar.

b. Ilmu al-Jarh wa al-Ta'dil. (Ilmu mencela dan memuji seseorang)

Ilmu *al-Jarh wa al-Ta'dil* ialah satu ilmu yang dikemukakan oleh para ulama Islam terutama sekali yang berkecimpung dalam bidang hadis. Tujuan utama ilmu ini bukannya mencaci, mencela atau memuji seseorang mengikut selera dan tanpa tujuan. Malah cacian dan pujian itu semata-mata untuk menjaga kesahan serta kebenaran riwayat yang diterima. Seseorang perawi hadis dicela dan dikategorikan hadis yang diriwayatkannya sebagai lemah berdasarkan kepada akhlak perilaku, ingatan, catatan dan juga suasana semasa yang berlaku ke atasnya. Abdullah ibn Lahiy'ah umpamanya yang dikategorikan sebagai perawi lemah hanya kerana buku-buku yang menghimpunkan hadis yang ditulisnya terbakar, dengan ketiadaan bukunya itu maka berlaku kesilapan yang banyak apabila meriwayatkan hadis berdasarkan ingatan beliau semata-mata. Sedangkan beliau memang terkenal sebagai seorang ulama terbilang, malah pernah menjadi Qadhi di Mesir. Begitu juga dengan al-Kilbi seorang perawi yang diterima hadisnya oleh Sufyan al-Thauri, namun dalam masa yang sama Sufyan al-Thauri tidak menggalakkan orang lain mengambil hadis daripadanya. (al-Qasimi: 115-116).

Dalam masa yang sama juga terdapat pujian (ta'dil) kepada perawi-perawi hadis kerana ia dikenali dan diketahui kejujuran, keikhlasan, kerendahan diri, akhlak peribadi yang tinggi serta ketundukan dan kepatuhan mereka kepada segala arahan Allah s.w.t.. Di samping mempunyai catatan dan ingatan yang kuat dalam periwayatan hadis seperti Imam al-Bukhari, Imam Malik, Sufyan al-Thauri dan seumpama mereka. Pujian dan celaan kepada perawi-perawi hadis dilakukan dengan cukup profesional tanpa wujudnya prasangka buruk dan bukannya atas sesuatu kepentingan, malah semata-mata dengan niat dan semangat untuk menjaga umat dan masyarakat daripada menerima khabar atau hadis yang lemah dan tidak dipastikan kebenarannya.

Imam Ibn Salah umpamanya menegaskan "Menjadi kewajipan kepada sesiapa yang menceburi bidang ini (al-Jarh wa al-Ta'dil) bertaqwa kepada Allah s.w.t., tetap teguh atas agamanya, serta elakkan dari bersifat dan bersikap mudah, agar tidak dicela orang yang sepatutnya dipuji dan diracuni dengan celaan individu yang seharusnya dipuji sehingga kekal celaan ke atasnya sepanjang zaman". Ulasan seperti itu juga diberikan oleh Ibn Hajar al-'Asqalani yang dianggap sebagai Amir al-Mu'minin dalam ilmu hadis dengan katanya "Elakkanlah individu yang berbicara atau menulis dalam seni ilmu *al-Jarh wa al-ta'dil* ini bersikap mudah dalam mentajrih dan menta'dilkan seseorang kerana sekiranya dia menta'dilkan seseorang individu tanpa kajian yang betul-betul dan kepastian yang benar maka seperti seorang pengkaji mengemukakan suatu hukum tanpa kajian yang terperinci, begitu juga apabila dia mentajrihkan seseorang tanpa penelitian yang betul maka dia telah mencela seseorang muslim yang bersih, namun kerana celaan ke atasnya maka kekal celaan itu sepanjang masa". Berdasarkan kenyataan inilah maka para ahli hadis yang berkecimpung dalam bidang *al-Jarh wa al-Ta'dil* ini sememangnya

dikenali dan diketahui sebagai seorang yang cukup profesional dan teliti dalam melaksanakan tugas mereka.

Malah dalam masa yang sama terdapat kod etika atau syarat-syarat tertentu dalam bidang *al-Jarh wa al-Ta'dil* antaranya ialah (Qasim Ali Said, 1988: 135-139).

- i) Mempunyai ilmu yang mendalam berkenaan ilmu ini, seperti ilmu mengenai perawi-perawi hadis, pengetahuan tentang lafaz-lafaz yang digunakan, memahami mengenai perbezaan para fuqaha terhadap individu-individu yang dicela dan dipuji serta mengkaji secara mendalam berkenaan akhlak peribadi para perawi hadis.
- ii) Kefahaman serta pegangan agama yang cukup kuat, seperti rendah diri, bertaqwa, ikhlas, tulus murni, bukan mencari nama, benar dalam segala tindakan dan sebagainya.

Kriteria-kriteria yang digunapakai dalam disiplin ilmu *al-Jarh wa al-Ta'dil* ini seharusnya digunapakai dalam etika kewartawanan masa kini.

Permasalahan etika kewartawanan

Permasalahan yang dihadapi oleh pengamal-pengamal media di negara kita, malah di seluruh dunia, bukannya menggariskan atau mewujudkan satu kod etika untuk diikuti atau dijadikan garis panduan, kerana kod etika kewartawanan sudah tersedia ada (Faridah Ibrahim, et al, 2000). Permasalahan utamanya ialah sikap serta pemikiran pengamal media itu sendiri. Selain dari itu campur tangan politik atau pihak atasan samada pemilik syarikat atau juga yang menentukan dasar juga merupakan antara faktor-faktor utama mengapa kod etika yang tersedia ada tidak diikuti.

Kepentingan peribadi atau kelompok tertentu merupakan hambatan utama mengapa kod etika kewartawanan tidak dipatuhi. Kod etika kewartawanan yang tersedia ada sebenarnya mencukupi untuk dijadikan panduan serta rujukkan namun sejauh mana ia diikuti atau dijadikan panduan oleh pengamal-pengamal media, inilah yang perlu diperincikan. Berasaskan kenyataan tersebut maka, setiap etika dalam apa jua profesion yang diceburi sebenarnya wujud dalam fikiran setiap individu yang bertanggungjawab. Ini kerana setiap etika yang dikemukakan merupakan samada etika kewartawanan, etika penjawat awam, etika pasukan tentera atau polis, etika kedokteran dan sebagainya adalah berasaskan kepada falsafah kebenaran dan kejujuran. (Faridah dan Rajib, 1988: 28-36).

Andai diperhatikan kepada Kod Perilaku Profesional Anggota Kesatuan Kebangsaan Wartawan Malaysia (NUJM) dan Kod Wartawan Malaysia, maka tentunya ia dapat dijadikan sempadan dan juga panduan. Lapan perkara yang digariskan oleh NUJM itu sebenarnya menggambarkan apa yang terdapat dalam disiplin ilmu periwayatan hadith iaitu:

1. Menghormati kebenaran serta hak publik untuk mengetahui kebenaran merupakan tugas utama wartawan.

2. Di dalam melaksanakan tanggungjawab ini wartawan akan mempertahankan ke dua-dua prinsip ini: kebebasan memungut dan menerbitkan berita dengan jujur serta hak untuk mengeluarkan ulasan dan kritikan secara adil.
3. Wartawan akan hanya melaporkan fakta-fakta yang diketahui asal usulnya. Wartawan tidak akan menyembunyikan sebarang maklumat atau memalsukan sebarang dokumen.
4. Wartawan akan menggunakan kaedah yang adil untuk memperolehi berita, gambar dan dokumen.
5. Sebarang maklumat yang diterbitkan jika didapati tidak tepat, maka wartawan harus berusaha untuk memperbetulkannya.
6. Wartawan akan menghormati rahsia profesional berhubung dengan sumber maklumat.
7. Wartawan akan menganggap perbuatan-perbuatan ini sebagai kesalahan profesional yang paling besar: Plagiat, mengumpat, fitnah lisan (slander), fitnah bertulis (libel) dan tuduhan-tuduhan tidak berasas. Penerimaan sogokan dalam apa bentuk sekalipun, sebagai saguhati untuk penerbitan atau menyembunyikan maklumat.
8. Wartawan mengiktiraf hak rakan-rakan sekerjanya berhubung dengan soal-soal profesional bidang itu: wartawan akan menolak sebarang campur tangan daripada pihak kerajaan atau pihak-pihak lain.

Manakala Kod Etika Kewartawanan Malaysia yang dilancarkan pada 20 Mei 1989 oleh Institut Akhbar Malaysia (MPI) dan Persatuan Editor Akhbar (ONE) pula dikatakan lebih memberi penumpuan kepada kod etika kewartawanan Islam. Berdasarkan kepada kod etika kewartawanan Malaysia dan juga kod etika kewartawanan yang tersedia ada, maka terdapat beberapa perkara yang perlu dikemukakan sekiranya perlu membina kod etika kewartawanan Islam. (Mustafa Masyhur, dengan sedikit pengurangan dan penambahan).

- 1) Bertaqwa dan takut kepada Allah s.w.t. dalam setiap khabar berita yang di beri ulasan, serta menjaga akhlak peribadi dengan akhlak dan adab-adab Islam.
- 2) Bersifat amanah pada diri dan masyarakat dengan menyiarkan kebenaran dan khabar berita yang berfaedah serta membuat kajian yang terperinci sebelum disebarkan setiap khabar berita yang diterima.
- 3) Menjadikan dakwah sebagai matlamat utamanya bukan hanya mendapatkan keuntungan semata-mata. Dengan cara menghubungkan isu-isu dan berita yang ditulisnya dengan dakwah kepada Allah s.w.t., agar manusia mengetahui bahawa agama Allah atau risalah Islam itu meliputi seluruh bidang kehidupan.
- 4) Berusaha menolak segala pembohongan/penulisan serta pemikiran yang menyesatkan serta mengembalikan mereka kepada jalan Allah s.w.t. kerana itulah satu-satunya jalan yang memberi kebahagiaan kepada manusia.

Kesimpulan

Islam sememangnya menggalakan semangat kebebasan berfikir, bersuara dan bertindak di kalangan penganutnya, namun kerangka berfikir, bertindak dan bersuara tersebut perlu

dilaksanakan dalam konteks kebertanggungjawaban dan kesejahteraan masyarakat. Oleh kerana Islam lebih mengutamakan kepentingan serta kesejahteraan masyarakat terbanyak daripada kepentingan individu maka kebebasan individu dalam Islam perlu dikawal dan diawasi agar tidak mengganggu gugat kepentingan umum.^{vi} Justeru itulah dalam al-Quran dinyatakan secara jelas mengapakah setiap perkhabaran yang diterima perlu ditapis dan dibuat research terlebih dahulu kerana kesudahannya atau natijahnya kelak ialah masyarakat itu sendiri yang akan menerima akibatnya.

Rujukan

Faridah Ibrahim, Mus Chairil Samani,(2000), *Etika Kewartawanan* (edisi 2), Subang Jaya: F.A.R. Publishers.

Mustafa Masyhur (1989), *Suri Teladan di Sepanjang Jalan Dakwah* (terj), Kuala Lumpur: Dewan Pustaka Fajar.

Muhammad Jamal al-Din al-Qasimi (t.t), *Qawa'id al-Tahdith min Fumun Mustalah al-Hadith*, Beirut: Dar al-Kutb al-'Ilmiyyah.

Qasim Ali Sa'ad (1988), *Mabahith fi 'Ilm al-Jarh wa al-Ta'dil*, Beirut: Dar al-Basya'ir al-Islamiyyah.

Nur al-Din 'Ali bin Muhammad bin Sultan (1971) *Al-Asrar al-Marfu'ah fi al-Akhar al-Maudu'ah*, Beirut: Al-Maktab al-Islamiy.

Ibn Salah (1989) *Muqadimmah Ibn Salah wa Mahasin al-Istillah*, al-Qahirah: Dar al-Ma'arif.

ⁱ Berasaskan kepada sabda Rasulullah s.a.w. yang bermaksud “*Sesungguhnya aku dituskan/dibangkitkan untuk menyempurnakan akhlak yang baik*”. Hadis ini juga bermaksud bahawa akhlak melalui proses-proses tertentu yang bermula dengan kekurangan sehinggalah ia menjadi sempurna.

ⁱⁱ Berdasarkan kepada sabda Rasulullah s.a.w.

ثَقُلْ مَا يَوْضَعُ فِي الْمِيزَانِ يَوْمَ الْقِيَامَةِ حَسَنَ الْخُلُقِ

Maksudnya: perkara yang paling berat dalam timbangan hari akhirat kelak ialah akhlak yang baik.

ⁱⁱⁱ Syarat-syarat yang menentukan sesebuah hadis sahih atau tidak merupakan syarat yang ditentukan oleh ahli-ahli yang berkeelayakan dalam bidang tersebut. Ia merupakan syarat yang disepakati dan diterima bersama.

^{iv} Penentuan sesuatu hadis itu lemah adalah berdasarkan kepada dua factor utama iaitu kerana kelemahan perawinya dan juga kerana sanadnya terputus. Kaedah begini juga boleh digunapakai dalam menentukan sesuatu berita yang diterima oleh wartawan betul atau salah.

^v Untuk keterangan lanjut sila lihat Muhammad Jamal al-Din al-Qasimi (1979), *Qawa'id al-Tahdith*, hal 113. Lihat juga Muhammad 'Aja' al-Khatib (1989), *Usul al-Hadith*, hal 351.

^{vi} Ibadat zakat yang berbentuk pengagihan harta kekayaan kepada masyarakat dan konsep *al-'Amr bi al-Ma'ruf wa al-Nahy 'an al-Munkar* yang merupakan suatu pentuk pengawalan kepada tindak-tanduk masyarakat, merupakan dua bentuk ajaran asas dalam Islam yang menunjukkan bahawa Islam mengutamakan kepentingan dan kesejahteraan masyarakat umum. Ini bukanlah bermakna bahawa Islam

tidak mengambil tahu atau tidak menghiraukan kehendak dan kesejahteraan individu, namun Islam mengemukakan kaedah kepada penganutnya apabila kepentingan individu bertembung dengan kepentingan masyarakat maka kepentingan masyarakat itu yang perlu diutamakan.